



Qaffasinnerusumik ilinniarnertit ungasissumiit ilinniartitsinikkut ingerlanneqarsinnaa-nerat Savalimmiuni, Islandimi Kalaallit Nunaannilu Naalakkersuisut nunani pingasuni tigussaasumik suleqatigiiffimmik pilersitsisoqarsinnaanera pillugu misissuisoqarnissaa Nunat Avannarliit Killiit Siunnersuisoqatigiiffiata kammattuutigaa.

(Aallartitat Siulittaasuat Pipaluk Lynge-Rasmussen)
(Siullermeerneqarnera)

Coronamik ajornartoornerup nunarsuaq tamaat allatut eqqarsarnissamik pinngitsaalivaat. Ornigulluni ataatsimiinnerit amerlanertigut ingerlanneqarsinnaasarsimangillat, paasinarsivorlu, qarasaasiakkut ataatsimiinnerit ingerlanneqarsinnaalluartut. Aamma tamanna pisimavoq Ilinniartitaanerup iluani, amerlasuut qarasaasiakkut ilinniartinneqarnissartik sungiuttariaqalersimammasuk.

Misilittakkat pitsaapput. Amerlanerit isumaqatigaat, ilaatigut ornigulluni naapittarnissaq pisariaqarsinnaasoq, kisiannili sorpassuit qarasaasiakkut aaqinneqarsinnaallutik. Ilinniartitaanermi aamma tamanna atuuppoq.

Maani nunatsinni qularutissaanngilaq, amerlanerit ilinniagaqarnissaat pisariaqartikkatsigu. Taamaattumik Demokraatit isumaqarput, pingaartuusoq, tamatta isumassarsiat tassunga tunngasut pimooruttariaqarigut. Tassunga tunngatillugu Islandimik Savalimmiunillu suleqateqarnissat misissussallugu iluatinnaateqartorujussuuvoq.

Demokraatilli erseqqissassavaat, oqaatsit assigiinngitsut pingasut atorlugit suleqatigiinneq oqaatsitigut ajornakusoorsinnaammat. Tamanna misissuineri ukkatarineqartariaqarpoq.

Taamatut oqaaseqaateqarluta siunnersuut akuerineqartussatut innersuussutigaarput.